

3

HISTORIA

CEV VERISSIMA

à calumnijs multorum vindicata,


QVAE REFERT M. VLPPII TRAIANI AVGVSTI
animam precibus Diui GREGORII Pontificis Romani
à tartareis cruciatibus ereptam.

QVOD D. HIERONYMVS STRIDONENSIS
S. R. E. Presbyter fuesit Cardinalis tractatus duo, alter locupletior
secundo, alter nunc primum editus.

AVCTORE F. ALFONSO CIAONE
HISPANO BIACENSI,

Doctore Theologo instituti Prædicatorum, & Ro-
mani Pontificis Pœnitentiario.

AD SANCTISSIMVM D. NOSTRVN
GREGORIVN XIII.
CVM PRIVILEGIO.



VENETIIS,

Apud Dominicum Nicolinum.
M D LXXXIII.

Caruccinovum + Romæ.

HISTORIA

CEV VERISSIMA

et aliorum innotuit / et aliorum

QVAE REPERTA M. V. DE TEATIS / animalia quibusdam / animalia quibusdam / animalia quibusdam

QVAE D. RIGORIS M. V. DE TEATIS / animalia quibusdam / animalia quibusdam / animalia quibusdam

AVCTORE F. ALFONSO CIACONE / HISPANO BACENSE

Protonotario / animalia quibusdam / animalia quibusdam / animalia quibusdam

AD SANCTISSIMAM D. NOSTRAM / GREGORIAM XIIII / CAM BRILLIENSI



VENETIAE

M. D. LXXXIII

GREGORIO XIII.

PONT. OPT. MAX.

F. ALFONSVS CIA CON,

minor suus Pœnitentiarius, omni-

modam, felicitatem

precatur.



*IVTIVS me torfit,
BEATISSIME
PATER, cunctos
firmè Christianos autho-
res, qui Urbis Roma hi-
storias tradidere, id sum-
mopere curasse, ut vete-*

*ris Urbis simulachra, ornamenta, ruinasque
describerent, monumenta autem religionis,
qua innumera prope, inibi reperiuntur, silen-
tio præterÿsse: nam duram est creditu ne-
glexisse quasi sacra non longissimè præstarent
profanis, aut profana digna ex ulla parte es-
sent, qua cum sacris conferrentur Quod in cau-
sa præcipue fuit, ut rerum memorãdarum ni-
sit aliquod vestigium relictum, aut ulla inter*

* 2 homines

homines nostri seculi memoria extet; cum plurima, inter tot Urbis direptiones & incendia perierint: bonam partem, quæ superfuit, similibus iacturis expositam, parem aliquando calamitatem passuram timeamus, nisi maturè in literarum monumenta translata, perpetuitatem aliquam fuerint adeptæ. Quot enim Urbis Basilicas, magnificentissima templa, martyrum, aliorumq; sanctorum reliquias, translationum ipsorum instrumenta, aut tempus rerum edax non absumpsit, aut barbarus hostis non vastavit, diripuit, incendit, & dispersit? Quotus enim existit, non dico exterius, sed cuius etiam, Urbisve incolæ, qui uniuersos sanctorum thesauros passim in ædibus sacris reconditos norit, rerumq; omnium sacrarum notitiam sit uel mediocrem assequutus? Nihil magis Romani votis concipiunt, quàm rerum piarum, quas penes se frequentissimas habent, exactam cognitionem adipisci; nihil magis exteri exoptant, quibus præcipuè non est Romam adeundi facultas: earum enim rerum notitia plenius & clarius adepta desiderium cuiusque accenderetur magis, Urbem sacraq; ipsius loca inuisendi.

Hinc

Hinc versus eam ingētiore excitaretur affectus,
& ad pietatem, religionemq, tenacius retinen-
dam inducerentur, facie præsertim Pontificis
visa, cuius conspectus solet plerunque viris pijs
summam reuerentiam submissionem & gra-
tiam conciliare. Multò enim fortius præsen-
tia mouent, quàm quæ absentia referuntur. Pro-
inde **BEATISSIME PATER**, de Vr-
bis ornamentis sacris, colligendis, & ad præsen-
tium posterorumque memoriam refricandam
in vnum redigendis studiosè incubui. Annum
enim integrum, duobus scriptoribus comitatus
in ea re insumpsi, trecentis Basilicis, templis, lo-
cisq, alijs sacris, diligenter perlustratis, (toti-
dem enim hodie in Vrbe, ex plurimis supersunt.)
ex archiuis, protocollis, vetustis instrumentis,
marmoreis lapidibus, veterum, recentiumque
historiarum, præsertim ecclesiasticarum monu-
mentis, quid ubique suo tempore locorum illo-
rum gestum, quæ illorum origo, eiectio, dedica-
tioq, prima extiterit, quæ martyrum & alio-
rum sanctorum exuuia, vel ab initio inibi re-
condita, vel aliunde translata: qui viri sancti-
monia, dignitate, genere, doctrina, militia, arte-
ve alia

ve alia clari & insignes inibi sepulti, cum ipso-
rum elogijs & epitaphijs adiunctis, ut nihil ul-
tra scitu dignum ex ijs locis desiderari possit: ut
res Urbis sacra ita eo ordine cunctis innotesce-
rent, & ad posteritatem facilius & magis
integra pervenirent. Verum quia labor hic,
gratus ne, an ingratus tua Beatitudini sit futu-
rus ignoro, tandiu illum differendum & matu-
randum censui, quandiu tuus non assensus acce-
deret. Interim tamen, ne vacuus coram cle-
mentissimo Principe comparerem, munuscu-
lum offero exiguitati ingenioli mei non absimi-
le. Verum quia in gloriam Diui Gregorij ce-
dit, non omnino conspectu tuae sanctitatis indi-
gnum. Historiam enim illam continet diligen-
tius solito tractatam, Traiani Caesaris animam
à cruciatibus tartareis, precibus Diui Gregorij
ereptam. Quam licet nonnulli perperam la-
cerent, falsitatisque traducant: ego pro virili
ceus verissimam gravissimorum authorum te-
stimonijs tueor, singulisque obiectionibus satis-
facio. Cum autem singularem affectum erga
illum virum sanctissimum geras, non dubium
quin ea res sit tibi gratissima futura. praesertim
eius,

eius, cuius nomen felix & faustum bonique ho-
minis; successor in sede Pontificia factus, si-
mulque mores imbuisti: dum summum stu-
dium in pietate, religioneque Christiana, ubi-
que terrarum dilatanda, dissidijsque hreti-
corum circa ipsam exortis, componendis adhi-
beas, gratissimam cunctis aurem prabeas, au-
scultesque singulos benignissime, in agendis pru-
dentiam & dexteritatem, in discernendo acre
iudicium, in distribuendis ecclesiasticis sacer-
dotijs iustitiam & aequitatem, in rebus omni-
bus modestiam cuncti admirentur; adeo ut li-
terati & probi, nullum Pontificatum aut se-
culum fuerint felicius adepti; nullaq; illis au-
rea etas florentior affulserit. In ornanda Vr-
be, collegijs & templis erigendis dirutis & col-
lapsis reparandis, pontibus, fontibus, struētū-
ris, picturis, magnificentiam cuncti commen-
dant, ut nihil ad Pontificatus tui gloriam,
quam longevitas, aut accedere, aut desidera-
ri possit. Qua fœdere inter Christianos Prin-
cipes, tua auctoritate icto, Turcarum no-
men & perfidiam deleas, religionisque cuncta
dissidia componas, ut te in terris Pastorem
unicum,

unicum, cunctus grex; orbisque uniuersus
terrarum concors, & pacatus agnoscat. Vi-
ue felix multos annos Pontificum omnium mi-
tissime. Roma Pridie Nonarum Octobrium,
anno restituta salutis. M D LXXXIII.



1

HISTORIA ILLA, CEV VERISSIMA,

à calumnijs vindicata, quæ refert,

M. VLPII TRAIANI AVGVSTI
ANIMAM PRECIBVS
DIVI GREGORII PONT. ROM.

A Tartareis cruciatibus ereptam.



EM cunctis facturum me arbitror gratissimā, si historiam illam, quæ circumfertur, fuisse M. Vlpij Traiani Augusti animā precibus diui Gregorij Roma. Pont. à cruciatibus tartareis ereptā salutemq; consecutam, pro rei dignitate diffusius tractare: & quid fidei & veritatis habeat, quibusve authorum testimoniiis innitatur, expendere; Video enim plerosq; nostra ætate viros clarissimos theologos & historiographos, partim de ea historia dubitare, partim inficiari, & nō paucos ceu vulgi commentum, anilemq; fabulam prorsus rejicere & deridere. Theologi nanque, quibusdam rationibus inducti, historiographi, quod authorū testimonijs destituti videātur, in eas angustias adiunguntur. Verū si rationes à theologis aliquot in-

A ductas

Traianus ad preces

ductas non obesse veritati hiltoriæ , neque deesse
 testimonia authorum præclara , quæ rem gestam
 confirment, indicâuero, videbor pro virili animo-
 rum dubitationi fecisse satis , & Traiani felicitatē
 à calumniis illorum vindicasse , qui eam gloriam
 licet non odio aut inuidia, opinione tamen aduer-
 sa, tam diuo Gregorio , quàm ipsi Traiano Cæsari
 eripere moliantur . Neque aliena erit huiusmodi
 tractatio , si victorijs Dacicis à me alibi tractatis, &
 hanc multo illis insigniorem annecterē , quæ Dei
 optimi maximi liberalitate & clemētia, precibus-
 que sanctissimi Pontificis Traiano de æterna mor-
 te, principibusq; tenebrarum porta est. Victoriis,
 victoria felicior, triumphis, triumphus præclarius
 accedit, & latior. fieri etiam potuit , vt Traianum
 in Dacicam expeditionem, priorem, seu postero-
 rem proficiscentem , vidua ius exigēs tunc primū
 interpellarit , quæ potissimum occasio fuit diuo
 Gregorio pro ipso ad Deum preces fundendi: mu-
 nusque assequendi , quod immortalem esset san-
 cto pontifici gloriam paraturum. Cuius etiam par-
 ticeps existit Beatissimus Pontifex Romanus Gre-
 gorius XIII. qui illius & nomen , & sedem probi-
 tate , & doctrina successor tenet. In tractando autē
 argumento proposito ordinem hunc potissimum
 sequar, vt prius hiltoriam recenscam, quæ occasio
 fuit diuo Gregorio orâdi pro Traiano , deinde ip-
 sius

fius Traiani liberationem subsecutam, quā multis grauisimorum auctorum testimoniis confirmabo; & demum rationes, quæ recētiore aliquot viros, pios, & doctos mouerunt, quo minus in eādem nobiscum sententiam descenderent dissoluam: vt historiam eam celebrem, totoq; orbe cantatissimam, iam non quiuis pro libito vt figmentum refellere, sed recipere & venerari vt verissimā & certissimam summopere deinceps curet: & ita finem huic tractationi demum imponam. A Traiani igitur historia, viduæ ius reddentis, primum exordiar. Traiano Cæsari Augusto in Dacicam, priorem, aut posteriorem, vt censeo, expeditionē proficiscenti, nondum urbem egresso, mulier occurrit, senio confecta, pannis sordida, vultuq; lugubri, ipsumque militum aciebus stipatum, Senatu Populoq; Romano honoris gratia prosequente, cœpit valide; lachrymis obortis, properantem compellare. Traiane Princeps pijsimè formiæ viduæ, & in summa egestate constitutæ, teneat te miseratio. Te imperium moderante, iuuenes nequam natum vnicum, quem vnicè diligebam, innoxium quidem illum interfecerūt: baculum senectutis meæ, quo vnico solatio in arūnis utebar, qui solus solitudini & inopiæ meæ subueniebat. Interfectores humilitatem & tenuitatem meā cōtemnentes, non solum mihi satisfacere renuunt,

quam ad successorem quempiam cum indignitate transmitteres. Cæsar ratione viduæ conuictus, misericordiaq; pariter commotus, equo descēdit, tandiuq; inibi constitit, quandiu negotium examinaret, iusq; pauperculæ foemine expositæ diceret. Cumq; suaderetur Cæsari à plerisq; accelerari prosecutionem oportere, ipse tamē pedem de loco non mouit, donec officium, quod cœperat, expleisset. Reos nanq; catenis vinctos, è carcere eductos coram statui iussit, accusatio & probationes referuntur, breue tempus rei in defensionem suscipiunt: & tandem criminis patratores deprehensos capitaliter damnauit. Verum deprecātibus obnixē qui aderant, pro illorum salute, viduę magnam pecuniæ summam ex proprio fisco, quæ detrimentum amissi filii refarciret, numerari præcepit, & a doloscentes aliter quam morte mulctatos dimisit: tum quod Principis clementiam dedecere putaret præsentes & qui Cæsaris benignitatem precabantur supplices, letaliter punire, tū quod omnino & infustum iudicaret, à sanguine ciuium Romanorum id bellum & prosecutionem auspiciari. Vidua igitur accusatrix, pecunijs ditata, iuuenes rei moderatione supplicij lætissimi abscedūt, lenitatem & mansuetudinem Principis satis experti: cunctis qui aderant, exemplum rei gestæ pietatemq; Cæsaris summopere & admirantibus & com-

commendantibus: & ne monumentum tam egregij facti posteris lateret in marmore sculptum, vel in æs incisum in foro eiusdem Traiani Senatus Romanus collocauit: nam pictura in loco publico, & iniurijs cœli exposita, non tot utique annos perdurasset, quot fluxerunt ab obitu Traiani usque ad pontificatum Gregorij, videlicet cccclxxiij. Nec obijciat mihi quicquam Dionem Cassium Græcum historicum nunquam silentio præteriturum rem adeo insignem, si ita, ut fertur, gesta esset: nam is solus superfuit ex ijs qui vitam Traiani descripserunt: cæteri interciderunt. Sed is non videt Dionem de vita Traiani non extare, sed epitomæ duntaxat à Xiphilino ex ipso Dione contracta. Potuit namque Dion scribere, quod Xiphilinus breuitati studens subticuit. Veteres enim aliquot authores historias rerum gestarum in epitomæ redigentes, magno posteris detrimmento fuisse. Non careret nostra ætas Trogo Pompeo, non Tito Livio, si alterum Iustinus, Lucius Florus alterum in compendium non restrinxissent. Sed faciamus ita esse Dionem nihil de hac re scripsisse, continuo subsequetur, historiam, quam retulimus veram non esse? Quasi cuncta solus ipse debuisset tradere, nihil quæ alijs scribendum relinquere? Vnicus author vix cuncta complectitur, & multo plura prætermittit, quam scribat. Quid enim insignius de Traiano scribi poterat,

poterat, quam quod pueros quinq; mille ex omni Imperio selectæ indolis ita ali, & à præceptoribus erudiri curauerit, vt ea in facultate, eo in genere vitæ instituerentur, in quod magis natura procliuēs essent. Quod vtique Dion vel Xiphilinus præterijt, Plinius in panegyri cōmemorat. Traiano vita functo Senatus Hadriano successorī triumphos de Parthis & Armenis deferēbat, ipse modestia vsus recusauit, quare statuā Traiani vehi more triumphantis fecit, ne post mortem triumphī amitteret dignitatem, de Parthis & Armenis, quos ipse debellarat, rebellantesq; Imperio subiecerat. Quod Dion subticuit, alij prodidere. Quotam partem gemini bellī Dacici Dionem putas scripsisse? cum tanta ibi strenuē gesserit, Traianus, quæ vix multis voluminibus comprehendī queant? Sed dicēs Dion in vita Hadriani, & Xiphilinus in eius epitome, mulierculæ meminērunt, quæ hoc idem ab Hadriano, quod altera à Traiano petiit & impetrauit. Nam cum ei mulier fortē occurrisset in via, ab eoque, vt se audiret contēderet, quanquā primo sibi esse ocium negaret, tamen vbi mulier ita exclamare cœpit: noli igitur regnare, cōuersus libenter eam audiuit. Pariter igitur & alterius tempore Traiani meminissent: qui huius, sæculo Hadriani retulerunt. Fateor hoc tēpore Hadriani contingere potuisse, verum suspicor errore Dionis vel Xiphilini

Xiphilini factum, ut quod de Traiano Augusto legerant, vel audierant, id totum ad Hadrianum attinere; in animaduersione crediderint: quod solet non raro historicis contingere. Quod si eiusdem ferme rei duplex fuerit exemplum non contendo: dum tamen utriusque; foeminae ius flagitantis, historia constans habeatur. Potuit enim facile fieri, ut muliercula Hadrianum congregiens alterius improbitatem æmularetur, cum recens eo tempore ea historia esset & Hadrianus similiter Traiani exemplo commotus, eam comiter & patienter audiret. Quicquid horum senseris, historia Traiani ab eisdem auctoribus refertur, qui liberationem animae eiusdem precibus diui Gregorij tradiderunt, proinde fides utriusque; rei ex eisdem prorsus auctoribus pendet. Qui optimè id negotium callere poterant eo tempore, quo ornamenta urbis maxima ex parte integra extabant, & fori præcipuè Traiani in quo erat hæc historia, quam tractamus, marmore, ut diximus, sculpta, vel ære incisa. Sed veniamus iam tandem ad aliam posteriorem, quæ ex hac priori ortum habuit in qua diuus Gregorius legitur Traianum suis precibus à Tartaro vindicasse: quæ in hunc modum ab eisdem, quos citabimus authoribus refertur. Cum beatissimus Pontifex Gregorius, semel à Lateranensi ad Vaticanam basilicam clero & populo comitatus, procederet, supplicationes

de

de more faciens, contigit per forum Traiani iter habere. Inter plurima ornamenta quæ illic videbantur celebre erat illud ex marmore vel ere confectum, in quo Traiani simulachrum equo descendens ius reddebat viduæ flagitanti. Quod spectaculum & alias sæpe, & tunc maximè sanctissimi Pontificis animum perculerat: ad miserationemq; vehementissimè inclinarat. Quare affectu pietatis commotus, cœpit de Traiani Cæsaris salute fore sollicitus: qui tanti principis clemētiam, iustitiam, æquitarem, cœterasq; animi dotes pectore voluebat, atque admirabatur. Hinc in singultus, gemitus, atque lachrymas prorumpens, Sacrorum vatum, & euangelica oracula Deo optimo maximo proponebat, aiens. Tu Deus, & clementissimè domine dixisti, iudicate pupillo, subuenite oppresso, defendite viduam, & venite, arguite me: & rursus Dimitte, & dimittetur vobis: ne igitur, quæso, sis immemor fidelissimæ promissionis tuæ, & licet peccator & indignissimus sim, qui rem ita arduam audeo postulare, propter te metipsum & tui nominis gloriā propitiare animæ Traiani Cæsaris, principis iustissimi & æquissimi, qui tanta lenitate & mansuetudine usus est erga mulierem viduam pauperculam, iudicium sibi fieri postulantem. Perueniens deinde sanctissimus Pontifex ad sepulchrum beati Petri Aposto-

forum principis, postquam hostiam sacratissimā
 Deo viuenti obtulisset, diutius orauit, & fleuit, ac
 nocte sequenti veluti somno correptus corporeo,
 per mentis tamen vigiliam vidit angelum Dei nū
 ciantem se a domino fuisse exauditum, animamq;
 Traiani, vt poposcerat, liberatam, verum caueret
 sibi deinceps, ne pro infideli vllō vltius preces
 funderet, aut sacrificium offerret. Hanc quam re-
 tulimus historiā ex quamplurimis grauib; au-
 thoribus collectam, fidelem & veram esse, nec vt
 dubiam, aut commentitiam, a quoquam iure reij-
 ci debere, multorum testimonijs productis com-
 probabimus. Extat in primis Romæ in Bibliotheca
 Vaticana, Latina inquam, versus sinistram in-
 troeuntibus tertij plutei superiori parte, liber an-
 tiquitatis venerandæ, membranaceis chartis de-
 scriptus, qui est numero 153. vbi præter quatuor
 libros dialogorum diui Gregorij Papæ, & eiusdem
 vitam a Ioanne Leuita conscriptam, fragmenta
 quædam sunt adiuncta, aut potius Idyllia; conti-
 nentia erectionem & dedicationem a Gregorio
 Pontifice factā ecclesiæ S. Andreæ in Clivo Scauri,
 & lustrationem, seu expiationem eiusdē a Paschali
 secundo, quod illam Robertus Guiscardus tyran-
 nus violasset, inuentionē corporis S. Cæciliæ mar-
 tyris, & pleraque alia huiusmodi. In dedicatione
 autem & cōsecratione huiusmodi ædis, diuo An-
 dreæ

dræ apostolo sacræ, quam Petrus & Ioannes viri
 religiosissimi, diacones beati Gregorij ediderunt,
 testimonium iidem ferunt historiæ, quam nuper
 retulimus Traiani. Quam verbatim hic inseren-
 dam duxi, nihil de illorum dicendi stylum mutas.
 Anno secundo, inquit, pōtificatus diui Grego-
 rij Papæ, collecta Cardinalium, & Episcoporum,
 ac ceterorum Romanę Ecclesiæ multitudine cleri-
 ricorum, Ecclesiam istam, quam ad honorem san-
 cti Andræ apostoli in Cliuo Scauri construxerat,
 in qua etiam religionis rudimenta, & sanctitatis
 susceperat incrementa, eo quo decuit, prout eius
 anima desiderabat, consecrauit honore: quam et
 plenariè dotauit, & priuilegijs apostolicis pramu-
 niuit. Consecratione verò peracta, flexis ad terram
 genibus, se domino humili supplicatione pster-
 nens, preces fudit ad dominum, dicens: Domine
 Iesu Christe filij Dei viui, qui dixisti apostolis tuis,
 & per apostolos vniuersis fidelibus Christianis,
 quæcumq; petieritis patrem in nomine meo da-
 bit vobis, peto ab omnipotentia tuæ maiestatis,
 quatenus quicumq; deinceps in huius ecclesiæ cir-
 cuitu elegerit sepeliri, dummodo fidem tenuerit
 Christianam: non quod fides christiana descen-
 dentibus sine gratia diuina, salutem esset æternā
 conciliatura: sed quod peculiari auxilio, Christia-
 no in illo loco sepeliri eligenti, Deus faueret ne

absque pœnitentia & gratia ab hoc sæculo discederet. Oratione verò cōpleta, apparuit ei angelus Domini, dicens. Gregori exaudita est oratio tua, secundum quod a Domino postulasti, sed quia hoc poscere præsumpsisti, nihilominus & quia p̄ anima Traiani imperatoris, viri infidelis orandū esse duxisti, scias te in hoc sæculo a corporali, quā pateris infirmitate fore minimè liberandū. A qua si dū hæc domino non petisses, liberatus p̄cul dubio fuisses. Et certè sicut cœlestis nunciij, vera fuit atque p̄petua de exaudita oratione ap̄nūciatio, ita etiam infirmitatis non liberandæ casta nequaquam extitit comminatio: nam stomachi langore, pedumq; dolore, continuisq; febribus, licet lentis vsq; ad vitæ exitum laborauit. Hanc autem orationem, atq; diuinam reuelationem beatus Gregorius nobis videlicet Petro diacono & Ioanni diacono patefecit: quas ad scientiam posterorum, nos styli duximus officio transmittēdas. Hucusq; Petrus & Ioannes diacones beati Gregorij. Quæ omnia, vel ex hoc, vel alio simili exemplari transcripta, Romæ habentur in æde, Diuo Gregorio sacra, & in tabulam, publicæ memoriæ caulam, translata. Quorum testimonio Ioannes diaconus, qui multis annis post vitam ipsius beati Gregorij scripsit quasi coronidem addit, dicens. Ego quoque Ioannes humilis diaconus, & scriba

beatissimi

beatissimi patris Gregorij post ipsius transitum;
eius vitam & actus in scriptis præcipiente Ioanne
Pontifice summo redege. scribam autem Ioannes
iste leuita diui Gregorij se vocat, non quod ipsius
tempora consecutus fuerat, sed quod ipsius vitam
partim iam scripserat quando Ioannes VII. Ro-
manus Pontifex hoc illi munus iniunxit, vt ipse
inibi profiteretur. Hæc igitur fermè sunt quæ dia-
cones illi Petrus & Ioannes, diui Gregorij discipu-
li, in probitate vitæ & sanctimonia locij, quibus
cum arcana sui cordis tractabat, ad posterorum
notitiam prodiderunt; testes utiq; fidissimi, qui
Traiani animam precibus ipsius diui Gregorij à
tartaro ereptam, constantissimè profitentur, & ex
ore ipsiusmet se percepisse testantur. Succedit se-
cundo loco auctor vetustus vitæ diui Gregorij, quæ
in fronte operum ipsius præmittitur Basileæ per
Frobenium excussorum anno Christi 1564. qui li-
cet anonymus, non tamen contemnendus est au-
ctor. Hic consuetudinem habuit cum Petro diacono
diui Gregorij coniunctissimam; & ab ipso mul-
ta arcana hausit, quæ in historiam vitæ diui Gre-
gorij fidissimè transtulit: vt ipse ibidem fatetur.
Hic, a Petro diacono edoctus, historiam Traiani
a tartareis cruciatibus precibus diui Gregorij erep-
ti, diffusè prosequitur, & prout nos retulimus,
& ipse refert, atq; vt certissimam & constantissi-

mam

mam tuctur. Succedit tertio loco, sicut & ætate
 proximus, ita sanctitate vitæ & doctrina clarissi-
 mus, diuus Ioannes cognomento Chrysorrhoas
 Damascenus, vir profectò nunquam satis lauda-
 tus, siue mores, siue religionem, siue doctrinam
 & eloquentiam consideres. Is in sermone de illis,
 qui in fide hinc migrarunt, quod sacris operatio-
 nibus, & viuorum beneficijs multum iuuentur,
 ita inquit Gregorius, qui dialogus a nostris dici-
 tur, veteris Romæ episcopus, vir, quod testantur
 omnes, sacrarum disciplinarum intelligentia ce-
 lebris, cui etiam, vt ferunt, sacra facienti cœlestis
 angelus, socium se addidit, simul sacrificans; cùm
 per forum Traiani, lapidibus stratum, iter faceret,
 validas preces ad misericordem, animabusq; pro-
 pitium dominum habuit, vt Traiano Regi pec-
 cata dimitterentur: & confestim vox diuinitus al-
 lata, audita est, in hunc modum dicens: Preces tuas
 audiui, & veniam Traiano do. Tu verò deinceps
 pro impio hostiam mihi ne offeras. Testatur au-
 tem oriens, & occidens totus miraculum Germa-
 num, & irrefutabile. Hæc beatus Ioannes Cryso-
 rhoas Damascenus, iuxta versionē latinam e Gre-
 co exemplari, prodidit de hac Traiani historia,
 quæ suo sæculo celeberrima erat tum latinis, tum
 Græcis, & notissima tam Oriēti quàm Occidenti.
 Tantæ autem auctoritatis sanctus Ioannes Dama-
 scenus

scenus fuit, vt Sancta Synodus Nicena sub Hadriano primo Papa, & Constantino Imperatore a Irene eius matre trecentorum quinquaginta Episcoporum contra Iconomachos anno 781. congregata huiusmodi de illo testimonium perhibuerit. Ioannes qui ab Iconomachis Manzur contumeliosè nominatur cunctis relictis cum Matthæo Apostolo Christum sequutus est: longè maiores diuitias, quam sunt Arabica, existimans contumeliā pro Christo pati, maluitq; simul cum populo Christi affligi quam temporariam in peccato voluptatē. Ipse igitur cruce sua sublata pro Christo, Christi-que caris, Deum sequutus est; & ex Oriente per Christum tuba cecinit, non arbitratus ferendam, quæ in aliena effundebatur regione vaniloquentiam, & cum qui contra Dei catholicam ecclesiā instructus est, apparatus, rabiosamq; insaniam, sed hanc triumphans, ubiq; adhortatoriè & consolabiliter totam vitam duxit. In Ecclesijs enim veterem consuetudinem diligenter seruandam monuit: pacificam quoq; illam cōstitutionem & statutum quem Dominus etiam discipulis in signū quo cognoscerentur quod sui essent discipuli, dedit; Pacem meam relinquo vobis: conseruare & roborare studuit. Hæc Sancta Synodus Nicena. Et inferius venerabilem & dignum in fide virum, ac in ecclesia catholica probatum cēset, detestaturq;

Icono-

Iconoclastas hæreticos, qui in suo Sathanico conciliabulo damnationem aduersus eum in hæc verba protulerant. Iconolatæ & falsigrapho Manzuri, anathema. Doctori impietatis, & peruerso interpreti diuinæ scripturæ Manzuri, anathema. Hæc dixerim vt quanti momenti testimonium sit viri grauissimi & sanctissimi, & quem adeo impensè sancta Synodus laudat, perpendamus. Huc autem posteriorem fuisse diuo Gregorio plus centum annis, post pauca manifestissimè probabimus. Succedit quarto loco Ioannes diaconus Romanus, qui iubente Ioanne VIII. Romano Pontifice circa annum Domini 872. ex scrinijs apostolicis vitam beati Gregorij, quatuor libris complexus, collegit. Is lib. 2. cap. 44. eam historiam de liberatione animæ Traiani receptissimam fuisse apud ecclesias Anglicanas in quibus frequentissimè legebatur, & ceu certissimā refert, cōfirmat & tuetur, dicens: se horum admirari qui cum cuncta alia miracula a gloriosissimo Pontifice facta recipiāt, de hoc vno, licet certissimo, dubitarint. Cuius rei notitia facilè in ecclesias Anglicanas penetrare & diffundi potuit: Gregorio Anglorum apostolo & Episcopo prodente, quem Diuus Gregorius prædicandæ & fundandæ religionis gratia in eam Britannia insulam delegarat. Qui vt arcanorum mihi plus conscius potuit optimè eam historiam cal-

lere

lere illosq; populos primus docere. Quo effectum est, vt à fidei ministro susceptam, constantissimè super alias Christiani orbis ecclesias retinerent. Hos enumeratos authores, vel omnes, vel eorum aliquem, sequuntur Guilielmus Antisiodorensis Episcopus, lib. 4. cap. de damnatis. diuus Thomas in quæstionibus disputatis de veritate q. 6. artic. 6. & 1. Sentent. dist. 43. q. 2. artic. 2. ad 5. & iterum 4. Sententiarum dist. 45. q. 2. artic. 2. ad 5. & in vniuersum omnes Theologi ibidem istam historiã recipiunt. qui super quartum Sententiarum theologicarum magistri Petri Lombardi scripserunt. Præter hos eunt in eandem sententiam: & historiam Traiani liberati ab cruciatibus tartareis fatentur, Gottifredus Viterbiensis historicus celebris in parte quintadecima Panthei, quam versibus integram describit. Floruit autem hic sub Friderico primo & Urbano III. anno Christi 1155. Vincentius Beluacensis lib. 22. Speculi historialis c. 22. Diuus Antoninus 2. parte historiarum, titulo 12. cap. 3. §. 8. Diuus Vincetius in sermone 5. Gregorij. Abulensis super 4. lib. Regum. cap. 4. q. 57. Philippus Bergomensis lib. 10. Supplementi Chronicorum; Ioannes Stella in historia Pontificum in vita diui Gregorij; Ioannes Viguerius Granatensis in institutionibus Theologicis; Sixtus Senensis lib. 6. Bibliothecæ sanctæ annotatione 47. Clemens Monelia-

nus Cardinalis Aræ cœli in compendio catholice
 carum institutionum cap. 43. Fr. Laurétius Surius
 Carthusiensis in vita ipsius Diui Gregorij. Marti-
 nus Alspilcueta Doctor Nauarrus, vir nostra æta-
 te morum sanctimonia & magna doctrina litera-
 rum omnium clarissimus, summopereq; conimē-
 dandus, in Enchiridio de oratione, cap. 22. Mi-
 scellaneo. 13. non solum meam sententiam hac in
 re secutus, sed impensè etiam laudauit. Idem sen-
 tit F. Bartholomæus Medinensis ordinis Prædica-
 torū primarius olim Theologiæ professor in Aca-
 demia Salmaticensi, qui omnium doctorum viro-
 rum calculo, celeberrimus est habitus, in Com-
 mentarijs ad 3. partem Summæ Theologiæ S. Tho-
 mæ, super arti. 6. q. 52. licet circa circumstantias ali-
 quot non nihil allucinetur, vt postea demonstrabo.
 Sed veniamus iam tandem ad aliud argumenti ge-
 nus ex diuinis oraculis constans, quæ sanctissime
 duæ scemina suscepunt. Prior est beata Birgitta
 vidua & Heroïna Sueuitica, quâ vulgus pperâ Bri-
 gittâ, seu corruptius Brigidam vocat: vt admonuit
 Martinus V. in decreto quo illam secundo inter
 diuas retulit: scemina incomparabilis sanctitatis
 & prudentiæ, quæ libro 4. suarum reuelationum
 cap. 13. vbi de eleemosyna pauperibus pro animis
 defunctorum eroganda agitur, ita à Christo spō-
 so suo instruitur, dicente. Benefaciendum est spi-
 ritualiter

ritualiter & corporaliter : spiritualiter fundendo
ad Deum preces, quia nullus credit, quātum Deo
placent preces humilium ; sicut per exemplum
ostendam tibi. Si quis offerret regi pondus ma-
gnū argenti, diceretur à circumstantibus : hæc est
magna præsentatio ; si verò legeret vnum Pater no-
ster regi, derideretur. Sic est econtra apud Deū.
Quicumque enim offert pro anima alterius vnū
Pater nŕ, acceptius est Deo pōdere magno auri : si-
cut patuit in illo bono Gregorio, qui oratione sua
etiam infidelem Cæsarem eleuauit ad altiore
gradum. Ecce qualiter Christus spōsæ suæ Birgit-
tæ historiam liberationis Traiani Cæsaris infide-
lis precibus diui Gregorij factæ, insinuat, & testi-
monium eius rei certissimum reddit. Et licet hu-
iusmodi reuelationes vel oracula istarū vatum
non sint recipiendā vt scripta canonica, aut de-
creta synodica Patrum, veneranda tamē summo-
pere sunt : & plus illis fidei adhibendum, quā
historijs Liuianis, Sallustianis, Thucydidis & Po-
lybij, & multorum etiam qui res gestas in ecclesia
scribunt : quas tamen citra hæsitacionem cuncti
recipiunt, & vt constantissimas probant : Præse-
tim cum Bonifacius IX. in sanctione Pontificia,
qua illam inter cœlites refert, inquit. Hæc gene-
rosa vidua per grātiā sancti Spiritus promeruit
multis eorum cogitationes & affectiones intimas,

& gesta secretissima propalare, & visiones ac reuelationes varias videre, & audire: ac spiritu prophetico multa prædicere, quorum nonnulla effectu completa fuere, prout hæc & alia in eius reuelationum volumine plenissimè describuntur. Hæc Bonifacius I X. in sanctione illa secundo sui Pontificatus anno edita. Et ne mihi obijcias tempore scismatis ipsam fuisse a Bonifacio I X. diuis annumeratam, meminisse etiam oportebit, Martinum quintum eius successorem singula, quæ in decreto Bonifacii I X. continebantur, confirmasse, probasse rataq; & firma in perpetuum esse voluisse, ne de sanctimonia huius clarissimæ feminae & oraculis a Deo susceptis ullus ambigendi relinqueretur locus. Fatis autem cōcessit hæc sanctissima matrona Romæ anno Christi 1373. x. Cal. Augusti. sub Pontificatu Gregorij XI. & inter cœlites relata a Bonifacio I X. anno Christi 1391. & a Martino V. 1419. Birgittam, sequitur Mechthildis virgo docta & sanctissima, professione Benedictina, diuinis oraculis clara, & non inferior ipsa Birgitta, quæ libro quinto visionum, aut reuelationum spiritualis gratiæ ipsius, cap. 6. cuius titulus est. De animabus Sansonis, Solomonis, Origeni, & Traiani. ita habet. Rogata a quodam fratre, Dominum in oratione requisivi, vbi nam essent animæ Sansonis, Solomonis, Origenis, & Traiani.

Cui

Cui dominus. Quid pietas mea cum anima Sāsō-
nis egerit, volo esse ignotum: vt homines se de
inimicis suis vlcisci amplius pertimescant. Quid
misericordia mea cum anima Solomonis fecerit,
volo homines latere, quatenus carnalia peccata
ab omnibus magis deuitentur. Quid verò beni-
gnitas mea cum anima Origenis effecerit, volo
esse absconditum: vt nullus in scientia sua confi-
dens audeat eleuari. Quid verò de anima Traiani
liberalitas mea iusserit, volo homines ignorare,
quatenus fides catholica ex hoc magis extollatur.
Quia hic licet omnibus polleret virtutibus, Chri-
stiana tamen fide ac baptismo caruit. Hucusque
beata Mechthildis: quæ floruit anno Christi 1300.
Satis insinuauit illi Deus istorum salutem maxi-
mè de Sāsone, qui in cathalogo sanctorū (Heb. 11.)
ab Apostolo ponitur. licet non apertè explicuerit,
cum pietatis, misericordiæ, benignitatis, & libera-
litis meminit, qua circa singulorū animas vsum
fuisse manifestat. Hinc autem colligere licebit
Dionem Cassium falso criminatum fuisse Traia-
num, qui vinosum & præposteræ libidini deditū
impudens faciat. Cùm tamen hoc loco omnibus
polluisse virtutibus a Deo perhibeatur, quales in
viro infideli esse possunt: Multa etiam in Senecā
comminiscitur, & vbique carpit eius vitam & mo-
res, cum illa innocens, hi temperatissimi mode-
ratissimiq;

persecutorq; fuerat scruissimus Christiani nominis, vt qui plurimos milites Christi martyrio affecerat. Succedit etiam alia ingentior difficultas hominem videlicet iam tartareis pœnis addictum absque gratia Dei ab hoc sæculo discedentē, absq; baptismo & fide eximi his malis potuisse, in libertatem, quæ à rectissimo iudice assertum. Sed singulis his obiectionibus eo ordine, quo sunt propositæ, adeo satisfaciam, vt quies animo, & consensus concilietur intellectui. Ad priorem autem dubitationem, fuerit ne S. Ioannes Damascenus anterior vel posterior diuo Gregorio non erit difficile respondere. Quidam rem parum exactè perpendentes plus duobus sæculis anteriorem faciunt, vtpote sub Theodosio imperatore florentem, in testes inducentes Raphaelē Voloterranum lib. 21. Vincentium Beluacensem lib. 17. cap. 103. Antoninum Florentinum, & Trithemium in lib. de scriptoribus ecclesiasticis; videlicet anno 390. Cōstat autem D. Gregorium anno Christi DCIV. ex hac luce migrasse, dum igitur summa annorū altera alteri confertur, inueniemus sanctum Ioānem Damascenum priorem fuisse S. Gregorio ducentis & sexdecim annis: & ita sermonem illum defunctos viuorum beneficijs iuuari, & historiam salutis Traiani commentitia vtraque esse nihilque probare. At si negotium oculati⁹ inspiciamus, inueniemus

inueniemus procul dubio S. Ioannem Damasce-
 num plus vno seculo posteriorem diuo Gregorio
 fuisse. Nam auctores qui in testes hic inducuntur,
 quod sub Theodosio vixisset legentes non distin-
 xerunt, vter trium fuisset, sed ad primum ceu infi-
 gnio rem rationem temporis reduxerunt: Cum ta-
 men ille non sub Theodosij primi, nec secundi, sed
 tertij vixerit imperium, & illius successoris Leonis
 III. Huius rei inanimaduersio in causa fuit istis
 grauissimis auctoribus ad eundem scopulum im-
 pigendi, dum a Theodosio III. ad primum retro
 cedentes annorum rationem confundunt. Floruit
 igitur vir sanctissimus Ioannes cognomento Chry-
 sorrhoeas, monachus doctissimus Damasci Syriae
 sub imperium Theodosij III. cognomento Adra-
 mitteni, & Leonis III. iconomachi, anno Christi
 701. Cuius rei nulla nobis esset arroganda fides,
 nisi legitimos & indubitatos testes, in negotij hu-
 ius confirmationem induceremus. Extat enim vi-
 ta eiusdem sancti Ioannis Chrysorrhoeae, Arabicè
 descripta, & a Ioanne Patriarcha Hierosolymita-
 no Græcè versa, & ab aliquo alio Latina facta, quæ
 apertissimè docet sub imperium Leonis tertij, co-
 gnomento Isauri, virum hunc sanctissimum flo-
 ruisse. Aduersus Leonem nanque imperatorem
 Ioannes, Damasci Syriae agens, quod venerandas
 Christi & deiparae virginis imaginis euertaret,
 diuorumq;

diuorumq; simulachra, flammis efferus & furibū
dus exureret, libellis editis & epistolis varijs scrip-
tis, viriliter se tyranno opposuit, quibus bonam
partem Asiæ & Græciæ in cultu imaginum & pie-
tate religionis cōtinuit. Leo imperator, qui æger-
rime ferebat impietatem suam vbique terrarum
& locorum Ioannis scriptis traduci, neque homi-
nem capere aut punire poterat iuxta votum suū,
qui extra limites imperij versaretur, fraudem ma-
lignissimam commentus est, qua virum Dei per-
deret. Conquisitis nanque literis aliquot Ioānis,
ministros scribendi peritissimos asciuit, iniunxit-
que illis vt characteres proprios eiusdem ita mēti-
rentur, vt alij ab alijs dignosci haud possent. Qui-
bus epistolam confinxit, quasi ab ipso Ioanne ad
se secreto scriptam, velle se urbem Damascum re-
gemq; in potestatem Cæsaris tradere, tantum ipsi
cura esset, milites ad constitutam diem transmie-
tendi, futurum vt urbe insignissima & opulentis-
sima citra multum operæ & sumptus potiretur.
Hanc epistolam Cæsar ad Regem Damascenorū
remittere se dixit, animum erga se suum officio
salutari satis testari edicens, & vt vltcrius sibi ab
insidijs & traditoribus caueret, hortatus. Rex Da-
mascenorum Ioannem, qui a consilijs eius erat,
capit nullo defensionis iustæ patrocinio admissō,
dextram illi amputari iussit: quæ oranti, & con-

D

querenti

querenti ob imagines dei paræ & aliorum diuorū propugnatas, hoc sibi detrimentum illatum, ea quæ proximè consecuta est nocte, a dei para virgine restituta fuit, signo abscissionis in tanti miraculi fidem relicto. Gregorius item Cedrenus in suis annalibus, sub Leonis tertij imperium, cogno mento Isauri, & ob impietatem imaginum quæ sanctarum odium *ἡτοιμάχον*, & *Εἰσρημάχον* dicti Ioannem Damascenum vixisse testatur: melodijque comprehendisse eas cantilenes quas decretum in ecclesijs cani iubet. Et Suidas virum fuisse doctissimum prodit, & ætatis suæ nulli eorum, qui doctrina illustres fuere, secundum: Inter alia eius scripta canticorum canones Iambicos; & soluta oratione recenset, quos dicit fuisse incomparabiles; neque quoadvita propagaretur comparationem ullam admissuros. Franciscus etiam Maurolycus in suo martyrologio, S. Ioannem hunc Damascenum sub Theodosio III. qui Leonem Isaurum præcessit, vixisse asseuerat. F. Melchior Cano. hoc idem confirmat lib. locorum Theologicorū I. de humanæ historiæ auctoritate tractans, licet historiæ Traianicæ liberationis videatur repugnare, quem postea etiam nos impug nabimus. Sed quid opus est alienis testibus, cum ipse eam nobis suis scriptis controuersiam decidat: libro enim quarto orthodoxæ fidei cap. 17. contra Iconomachos

chos scribit, eisdemque in libro hæresum Iconoclastas, & Thymoleontes appellat, à Leone certè Hæuro, qui præcipuus fuit, sacrarum imaginum impugnator & euerfor. Eodem præterea hæresum libro Monotheletas commemorat Cyrum, S. Sergium, & Eusthatium, qui damnati sunt in sexta Synodo sub Agathone Papa. Aduersus quos copiosè & scripsit lib. 3. de orthodoxa fide cap. 14. & 15. Constat autem synodum sextam, quæ fuit ex Constantinopolitanis tertia, sub Agathone Papa anno tertriodecimo imperij Constantini quinti celebratam, qui incidit in annū Christi 681. Diuus Gregorius ex hac luce migravit, anno 604. Colligitur ergo 73. annos hos hæreticos posteriores diuo Gregorio fuisse, aduersus quos scribit S. Ioannes Damascenus: Quo profecto fit diuum Ioannem Chrysorrhoam, professione monachū, virum sanctissimum, pariter atque doctissimū, Damasce Syriæ incolam, qui libros quatuor orthodoxæ fidei, historiam duorum militum Christi Iosaphat & Barlaam, libros itē hæresum, & de imaginibus, & orationem defunctos in fide perfecta viuientium precibus iuuari, scripsit, multis annis diuo Gregorio posteriorem fuisse: potuisseq; optimè de illius oratione, & liberatione Traiani certo docuisse. Neque audiendus est Trithemius, qui libros quatuor orthodoxæ fidei scripsit; alterum

homines pro hominibus infidelibus, impijsque damnatis: Aduersus doctrinam, quā cunctos erudiit, agere visus, est, si hoc, quod refertur, diuus Gregorius admisit. Nam aut ignorabat Traianū idolatram, & in perfidia sua obijisse, aut optimè callebat, qualis, ille moriens fuisset: Ignorantia autem & conditionis Traiani & religionis, & quod non esset pro huiusmodi hominibus orandum, non poterat virum doctissimum & historiæ & rerum theologicarum fallere. Quod si calluit, non facile est illum a crimine aliquo graui vindicare: quod secus quam sentiret, faceret; & in re grauissima, & quæ a Theologis, peccatum lætale censetur, delinquere. Si enim pro Dæmonibus, iam iam damnatis, non licet preces effundere, non licebit pro animabus condemnatis orare, cum pares iisdem iudicentur: iuxta illud Augustini; Si Scircem patrem meum esse damnatum, non orarem pro eo plusquam pro diabolo. Tum quia nō minori illi & Deum, & nos, quam Dæmones odio prosequantur: utpotè caritate quauis omnimodo destituti. Præterea decretis pontificijs cautum & interdictum existit, cap. pro obeuntibus 13. q. 2. & c. placuit, 23. q. 5. Glossa recepta. cap. ex patre, de sepult. Quæ licet posteriora sint sæculo Gregorij: satis est, rationes quibus permoti sunt Pontifices ad illa constituenda semper viguisse, & a similibus precibus

precibus auocasse. Abulensis in commentarijs suis per quartum librum Regum cap. 4. q. 57. ubi diffusè hoc argumentum tractauit, fatetur diuum Gregorium lætaliter peccasse orando pro Traiano, verum fuisse exauditum, & in pœnam peccati supplicio affectum, vt dolore stomachi laboraret. Sed quis, iudicij compos, crederet, Deum exaudisse orationem hominis lætaliter in ea delinquentis, & arduam & inconsuetam rem illi postulanti concessisse? Nec virum sanctissimū & per omnes gradus suæ vitæ innocentissimum ita debemus traducere, aut inurere grauissima nota. Ioannes Leuita Romanus, qui vitam diui Gregorij iubente Ioanne VIII. Pōt. Rom. scripsit, aliter soluit hūc nodū, dicens: Gregorium non exorasse Deum pro Traiano, Sed tantum fleuisse. Sic enim cum non orasset; plangendo potuit exaudiri, sicut Moyses dolendo taceret, potuit clamasse videri. Cui dominus tacenti labijs: quid clamas, inquit, ad me? Nimirum Deus omnipotens corda renesque scrutatur, & frequenter ea misertus concedit: quæ homo quamuis vt carnalis desideret, ea tamen petere non præsumit. Vnde regius psalter psalmo 9. Desiderium pauperū exaudiuit dominus: & desideria cordis eorum exaudiuit auris tua. Hæc Ioannes Leuita: At ego non video quid referat plus, mente orare, quam voce: cum vtrunque sit cordis

dis & desiderij manifestatio & voti, quod concipimus, expressa postulatio, Deus enim nouit corda hominum & oratione magis sollicitatur mentis, quam vocis, licet vtraque sit illi cara & grata. Tantundem igitur erat, fleuisse diuum Gregorium, desiderasse, optasse, atque si vocis oratione salutem Traiani petiisset: præcipue cum Petrus & Ioannes diaconi diui Gregorii & auctor alius antiquus qui vitâ ipsius scripsit aperte prodant orasse illum & intentissimè, & S. Ioannes Damascenus, etiam sacrificium pro anima Traiani obtulisse. Quibus etiam consentit oraculum Beatæ Birgitæ, a Deo factû super hac re, quod nuper citauimus. Aliter igitur hæc erit obiectio diluenda. Existimare nanque oportet viros singulari Deo necessitate coniunctos, & qui familiarissimè ipso vtantur, audere plerunque magnâ & ardua quæque ab eo petere, & facere etiam, spiritu Sancto inductos ac instigatos, a quibus reliqui arcentur, atq; excluduntur, quod leue, temerarium, atque criminofum id facere illis procul dubio esset. Adducemus nō pauca exempla tum ex sacris literis, tum ex historiis Sanctorum, quæ hanc doctrinam satis comprobabunt. Abraham vnigenitum filium suum Isaac Gen. 10. monitu diuino sacrificare voluit, cum tamen huiusmodi victimæ humanæ adeo esset interdicta immolatio. Sanson, columnas, quibus innixum erat

erat templum Philistinorum, cōcutiens, ipsumq;
euertens, ita vt corruens, ruina non solum Philis-
teos, sed se perimeret, non vituperatur, sed excu-
satur, quod sp̄ritu Dei id fecisse creditus fuerit:
alius quiuis si hoc ausisset, grauissimè deliquisset
in Deum, homicidaq; haberetur sui ipsius. Augu-
stinus nanque primo de ciuitate Dei, excusat San-
sonem, quod instinctu diuino id fecerit, quia non
potuisset domum tantam propria virtute subuer-
tere, sed virtute Dei, quæ non adiuuat ad malum.

Cui subscribit diuus Thomas in commentariis su-
per caput 11. epistola ad Hebræos, lectione 7. Eo-
dem sp̄ritu diuino motus fuit Elias, cum duos
quinquagenarios duces centum militibus stipa-
tos, missos ab rege Ochozia, ad se capiendum, si
spontaneus venire recusaret igne de cælo bis im-
petrato incunctanter exussit. Hoc, quod Dei pro-
pheta, diuino numine afflatus petiit, & obtinuit,
duorum ducum, centumq; militum deflagratio-
nem, alius profectò etiam cogitare criminofum
duceret, tantum abest, vt a Deo peteret & impe-
trare se posse speraret. Numine Dei afflatus filius
ille prophetae, quendam, vt se percuteret in nò-
mine domini inuitauit, qui cùm acquiescere nol-
let, a Leone occurrente in via (sicut prophe-
ta prædixerat) discerptus est. Rursus alium repe-
rit, a quo stricto gladio impetit⁹ & vulneratus est.

Eodem

Eodē spiritu , & impulsu ductus fuit Eliseus, qui pueris ei illudentibus in nomine Domini maledixerit , & quadraginta ex illis vrsi saltu egressi discerpsent . Inducere autem quemquam ad vulnera alteri cuiquam inferenda, peccatum esset letiferum, nisi diuino quispiam numine afflatus fecisset S. Marcus Euangelista pollicem sibi, post fidem Christi susceptam, amputasse legitur , vt sacerdotio reprobis haberetur. Apollonia item virgo Alexandrina propria se sponte in ignem proiecit , ad quem erat, si paganismus non assentiretur, damnanda . Quæ tamen martyrio clara in ecclesia celebratur, quod Spiritu sancto impellente id fecerit : Aliter namq; aut membrum sibi aliquod amputare, aut non coactum, vel vi impulsus se in mortem dedere, nemini licet. Diua Catharina virgo Senensis, quadraginta integris diebus, plerumque cibo & potu quouis abstinuit . Beatus Nicolaus de Saxo , clarus sanctimonia apud Heluetios Eremita, viginti ferme annis, absque vlllo prorsus cibi aut potus genere perstitit , diuino id vtrique suggerente numine. Ecquis enim nunc videt si inedia huiusmodi tentasset, homicidium sui ipsius moliturum, grauisimeque in Deum peccaturum? Cum inedia intra septem dies, vel plurimum nouem exanimet . Diuus Thomas apostolus Christi cum semel nuptijs filie regis cuiusdam Indorum

4. Reg.
2.

E inter-

interfuiſſet, & à pincerna conuiuij colapho iniquiſſimè impeteretur, duo, legitur apud Abdiam Babylonix Episcopum libr. 9. Si tamen legitimus & non potius commentitius liber ille exiit à Domino imprecatum fuiſſe, & quod parceret in futuro, & puniret in præſenti, vt cæteri huius exemplo cauere deinceps offendere ſeuos Chriſti.

Quod mox diuina ultione ſubſequuta, confirmatum eſt. Nam ad fontem pincerna egreſſus, quo miniſtros aquam in conuiuium deferentes vrgeret: à leone dilaceratus fuit, membratimque diſciſſus. Cuius dextram ſacrilegam domesticus canis apprehendens, per ſingulos in conuiuiis accubentes circumtulit, vt eadem dextra abſciſſa maiorem famulo Dei gloriam referret, quam viuens ignominiam intulerat. Non animo iniuriæ vindicandæ hoc fecit Apoſtolus, quia magiſtro omnium didicerat, non propulſandam iniuriam viro perfecto, orandum pro perſequentibus, & calumniantibus, maxillam ſiniſtram ei offerendam, qui dextram percuteret: qui Spiritu ſancto fuerat olim repletus, & in Dei amicitia confirmatus: Sed zelo potius diuino, vt authoritas & reuerentia miniſtro euangelij ita apud barbaros conciliaretur: & noſſent ſe ſeruum eſſe Dei viuētis, ſub cuius protectione, & religione continebatur. Ita enim exiſtimabat, viam faciliorem multo ſterni ad euangelij

Matt. 5.

Luc. 6.

gelij prædicationem suscipiendam, quam si iniuriam illam Deus inultam relinqueret. Gloriam nanque Dei, nō propriam quærebat: sicut & Apostolus Paulus, qui genus, personam, eruditionem, labores pro Christo susceptos, arcana Dei visa refert, non inanem sui commendationem, sed ut inde maiorem auctoritatem apud Corinthios conciliaret, qui sciebat melius hac via iugo Christi subditurus, & contenturus etiam, & quando exempla huiusmodi minus secure ex Abdia peteremus, supersunt innumeri fidei testes, qui vitas sanctorum scripserunt, à quibus multo plura huiusmodi possemus inducere, quæ tamen fastidij causa prætereunda censuimus. Sed iam coronidem unico exēplo imponamus. Beata Tecla martyris prece sua, Falconillam, scēminam idolorum culticem, & à Christi ministerio alienam, eripuit ab inferis, ut testis est Sanctus Ioannes Damascenus, in sermone de defunctis piorum suffragijs iuandis. Cuncta ista exempla, quæ produximus, & multo plura quæ sanctorum virorum & scēminarum producere possemus, satis & manifestè conuincunt, multa ab ipsi gesta esse, quæ stuporem & admirationem habeant, neque reliquis ea licere, quæ communes leges & rationem excedant. Admirationi nanque non imitationi excitandæ leguntur, proponunturque: & quod alij absque

2. Cor.
11.

graui peccato facere non possunt, isti impune fecerunt: quod Dei numine regerentur. Ad instigam igitur horum, beatus Pontifex Gregorius petens liberationem animæ Traiani, non solum crimen nullū admisit, sed obsequium præstitit Deo, quod spiritu diuino ductus id postulauerit. Delinqueret quidem alius, qui spiritu Dei peculiari in re simili destitueretur, non diuus Gregorius qui probe norat impulsu numinis rem se gratam facturum, si liberationem Traiani postularet. Nam si quispiam admitteret, virum Dei in hoc negotio petendo grauiter deliquisse, aut saltem ignorantia excusari, quod crederet pro huiusmodi damnatis, & infidelibus orationem ad altissimum effundi posse, in altero innocentia & sanctimoniam beatissimi Pontificis detraheretur, in altero notam illi ignorantia inureret, quasi nesciret homo doctissimus, & tantopere in lege Dei versatus, peccatum letale esse, pro infidelibus uita functis & damnatis orare: præsertim pro Traiano, qui in Christianos ut idololatra quādiu vixit deliquerat, & in perfidia paganissimi decesserat. Crimen porro letale, nemo viro in Dei obsequio vigilantissimo impingere, citra magnā iniuriam & dedecus ipsius potest. Nam si petendo liberationem Traiani crimen aliquod admisisset, clementiam Dei potius irritasset, quam delinisset, & proinde petitionem non obtinisset suam

suam. Postquam autem continuo fuit exauditus precesq; ipsius susceptę, signũ est, non solum non peccasse, sed rē, qua Dei clementiā demereretur, fecisse. Voluit nanq; Deus hoc ferme vnico & rarissimo exemplo, virum sibi additiſſimum honore prosequi, sicut & beatam Teclam martyrem, vt alteri Traiani animi libertatē, alteri Falconillæ concederet: quo hinc, quales, quantique fuerint apud Deum, quā chari, quam amici totus orbis perpēderet, iudicaretq;: mirabilisq; fieret Deus in sanctis suis. Atqui obijciat mihi cōtinuo quispiam, Diuum Gregoriũ ob hoc factum fuisse à Deo punitum, vt perpetuo stomachi & pedũ dolore quādiu viueret, laboraret, lentis atq; febribus teneret. Nemo aut punitur nisi ob culpam, ergo aliquam Diuus Gregorius in illa petitione commisit, ob quam merito debuit à Deo puniri. Bene habet. Audi tñ benigne huius scrupuli dilutionē. Non legimus nec historia nostra prodit, diuum Gregorium aliquo supplicio affectũ cum primum liberationem animi Traiani obtinuit, sed admonitum dūtaxat, ne deinceps hostiā offerret pro homine infideli. Quod si vltius cōtendas, demum fuisse punitũ cū fidelib. cunctis, qui in cimiterio S. Andrea sepelirent, salutē æternā impetrauit, tūcq; mētionē tā huius petitionis, q̃ Traiani factā, q̃ causa extitissent huiusmodi punitionis inferēdæ: satisfaciā.

Non

Non abnuo, aliquam pœnam diuo Gregorio in
 secunda illa petitione irrogatam, sed quæ potius
 veteris fuisset confirmatio, quam recentis alicuius
 inflictio. Nam stomachi, & pedum dolore, in-
 salubritateque totius corporis multo ante & as-
 sidue afflictabatur, utpote grandævus, senioque
 confectus: quæ quo adiuveret fuit producta di-
 uino oraculo, ita ut spe firmæ valetudinis perpe-
 tuo esset cariturus. Quemadmodum autem ini-
 tio non in pœnam alicuius criminis praua illa cor-
 poris habitudo à Deo inflicta, ita sine nouo crimi-
 ne cōfirmata est, quod semper ad cohibendos car-
 nis impetus, & exercitium virtutis, utilissima fo-
 ret: & si quando, tum maxime necessaria esset: ubi
 tanta & stupēda dona à Deo impetrasset, quorum
 memoria facile superbire & insolentior fieri pote-
 rat. Sicut enim beatissimo Apostolo Paulo, ne ma-
 gnitudine reuelationum extolleretur, datus est sti-
 mulus carnis angelus Sathanæ, qui illum colaphi-
 zaret: imbecilla inquam corporis habitudo, mor-
 bis vexata caro, ita diuo Gregorio idem, ob ean-
 demque prorsus causam successit. Prudentissimus
 animorū medicus Deus agritudine corporis, mor-
 bos curat animi: ut quam primum quis ex donis
 Dei gloriari velit, mox aduersa corporis valetudo
 deprimat & corripiat, veluti pharmacum quod sit
 huiusmodi agritudini appositissimum. Adde,
 duas

2. Cor.

12.

duas alias rationes præter eam quam retulimus;
intercessisse; ob quas Deus voluit antiquos mor-
bos in diuo Gregorio inualescere, perpetuoq; ma-
nere citra crimen letale ab eo commissum. Primo
ne quispiam ex facto gloriosi Pontificis crederet
licere cuique pro infidelibus, cæterisque damna-
tis preces ad Deum fundere. Secundo ne exemplo
sanctissimi viri cōmoti aliqui pro infidelibus vi-
ta functis orarēt, & quod ipse diuino numine in-
ductus fecit, reliqui auderent: terrore illis iniecto
ex morbis diuinis, quos quandiu vixit perpeffus
est gloriosus Christi athleta. Absoluimus iam du-
bitationem, quæ præcipuè circa honestatem facti
diui Gregorii pro Traiani anima orantis, versaba-
tur, nunc ad aliam, quæ iustitiam & leges Dei cō-
cernit, accedamus. Durissimum quibusdam vide-
tur à tartaro reuocari quemquam in requiem à
tenebris in lucem; Deumque indixisse, nisi quis Ioan. 3.
renatus fuerit ex aqua & Spiritu sancto, non po-
test introire in regnum Dei: & alibi. Sine fide im- Hebr. 11.
possibile est placere Deo: & tamen Traianum si-
ne fide, sine baptismo, idololatrā in Christi mar-
tyres sequentem, salutem fuisse consecutum: diui-
namq; iustitiam passam fuisse huiusmodi homi-
nem æterna supplicia euadere qui in idolorū cul-
tu & religione, impenitens scelerum, quæ in Chri-
stianos admiserat, ex hac fuerat luce subtractus.

Dece-

Decedenti autē letali in crimine ex hac vita, æterna pœna sicut gratiæ æterna gloria respondet: non igitur miraculum recipiendum erit, quod tot leges euertere, tot decretis aduersari videtur. Hucusque dubitatio progressa, à nobis propulsanda, & refellenda est. Referam tamen prius quorundam sententias, ut maiori luce & splendore proposita hæc controuersia dirimatur. Melchior Cano. insignis & doctissimus theologus instituti prædicatorum Episcopus Canariensis, qui ingenio, eloquentia, suauitateque dicendi plurimum valuit, his forsan rationibus inductus locorum theologicorum libr. 11. Cum de humanæ historiæ auctoritate agit, hanc de Traiano precibus diui Gregorii liberato historiam negat, inquiens. Traianum Gregorii precibus à gehenna liberatum, non vulgo solum, sed diuo etiam Thomæ olim, iuueni Persuasum est. Persuasum est autem diui Ioannis Damasceni auctoritate, cui diuus sanctus Thomas plurimū deferebat. Nec verò historiā ego illam probo. Subiungit post pauca. Mirum enim est, hominem Græcum rem & nostram, & toto (ut ipse inquit) orbe vulgatam, Græcis suis prodidisse, quam historiā tamen omnis Latinorum ignorat. Hucusque Melchior Cano. Sed certe, ut quod sentio ingenue fatear, hæc eius sententia bis peccat, pace tanti viri dixerim, & nimia licentia, & historiā quæ hanc tracta-

tractationem concernunt, ignorantia. Nimia quidem licentia, quod duos viros sanctissimos Thomam Aquinatem, & Ioannem Damascenum, petulanter carpserit, dum alterum quasi nimis credulum damnat, alterum quasi exiguae fidei, imo & falsitatis traducit. Dicere enim diuum Thomam iuuenili ætate sicut & vulgus deceptum, immodestum est. Sancti enim viri, vt domicilia Spiritus sancti, templa Dei, vasa sacra, maxima cum reuerentia tractandi, & colendi sunt. Melius profecto egit diuus Thomas qui plurimum auctoritatis diuo Ioanni Damasceno detulit, quàm Melchior Cano. qui paucam aut nullam vtrique. Sententiam illam probaturus diuus Thomas, multo plura reuoluerat, plura quàm ipse cano perpenderat. Vastum enim illius viri sancti iudicium, non solet nisi re bene perpenſa & examinata sententiam ferre (id quod iuuenile ætatem in senilem sensus transformat,) & ultra diui Ioannis Damasceni, veritatem aliarum fuerat historiarum secutus. Ignorantiam autem historiarum fugere cano in hac re haud potest, qui asseruerit historiam omnem Latinorum hoc negotium ignorasse: Cum tamen Petrus, & Ioannes Leuitæ ab ipso met diuo Gregorio acceperint: Alter item Ioannes Romanus diaconus scripserit, Angelicæ historiæ testentur, Author ignotus coetaneus discipulorum ipsius beati Gregorij

diffuse meminere, sanctissimæ dux femina Bir-
 gitta, & Macchildis ex oraculo diuino prodide-
 rint: Sanctus Ioannes Damascenus suffragetur: nō
 ergo recipiendus est Cāno. siue impugnationem
 sanctorum, siue historiarum defectum nobis inge-
 rere moliatur. Hominem reuereor & illius digni-
 tatem, in re autem hac, vt falsa, ab ipso libenter
 dissentio. Gulielmus Altrifiodorensis, quem plu-
 res sequuntur in quarto Sententiarū cap. de dam-
 natis aliter se ab hac dubitatione extricare nititur;
 dum Traianū fuisse à diuo Gregorio suscitatum,
 baptizatumque, ac præteritorum criminum pœ-
 nitentem in sedes cœlestes euolasse, credit. Verum
 cum nulla, earum quas commemorauimus, histo-
 ria prodat, gratis videbitur esse dictum; nulloque
 prorsus fundamento fulciri. Ex historia enim rei
 gestę totum negotium pēder, ad quam quicquam
 addere, vel minuere haud licet. Si enim diuus Gre-
 gorius Traianum suscitatum baptizasset, aut pu-
 blice id factum, aut priuatim. Si publice, publi-
 cum cunctorum, qui aderant testimonium pate-
 sceret; si priuatim aliqui saltem interfuissent, qui
 aquam deferrent, qui Chrisma, diaconorum ali-
 quis secretorum conscius, qui rem tantam poste-
 ritati prodidisset. Nullus autem repertus est qui
 diceret, qui vulgaret: ergo credibile est, ita non ac-
 cidisse. Verum cum secreto potuisset ipse Traia-

nus vitæ restitui & suscitari, & ad sanctum Pontificē deduci, & occulte baptizari & id diuus Thomas quarto Sentent. loco citato, vt probabile admittat, diuus Vincentius & diuus Antoninus, nos item vt pium, & probabile recipiēdum ducimus: huic rei libenti animo assentimur. Ait enim diuus Thomas, De facto Traiani hoc modo potest probabiliter æstimari, quod precibus Beati Gregorij ad vitam fuerit reuocatus, & ibi gratiam cōsequutus sit, per quam remissionem peccatorū habuit, & per cōsequens immunitatē à pœna, sicut etiam apparet in omnibus illis, qui fuerūt à mortuis miraculose suscitati, quorum plures constat idololatrias & damnatos fuisse. De omnibus enim similiter dici oportet, quòd non erant in inferno finaliter deputati, sed secundum præsentem iustitiam priorum meritorum: secundum autem superiores causas, quibus præuidebantur ad uitam reuocandi, erat de eis aliter disponendum. Hæc D. Thomas. Quo fit vt salutem fuerit consecutus non absolute, sed præcedentibus Baptismo, fide, gratia, charitate, & pœnitentia ante actorum criminum, quæ olim admiserat, Solum cum ipso dispensatum à Deo, vt à carceribus infernis perpetuis redemptionē assequeretur & libertatē, (quod lex communis vetat) diuina dispensatio, & privilegiū peculiare tribuit. Bernardinus Corius ora-

tor & historiographus clarus, Mediolanensis, in
vita Traiani commentum, seu somnium refert,
quod nescio si ipse inuenit, aut ab alijs acceptum
in suam historiam transtulit. Post 492. annos, in-
quit, à morte Traiani decursos, in sepulchro quo-
dam à cæmentariis erutum craneum humanum,
linguam habens adhuc incorruptam, quod por-
tenti loco ad diuum Gregorium, tunc Romanum
Pontificem, delatum, & ab ipso in Dei nomine
cuius esset rogatum, imperatoris Traiani, respon-
dit, cuius anima ab obitu in illum vsq; diem tar-
tareis tormentis puniretur. Huius rei admiratio-
ne captus sanctus Pontifex, eiusdemque probita-
tis, & iustitiæ memor, preces cum lachrymis fu-
dit ad Deum, & ita illius liberationem impetra-
uit. Quis autem non uideat huiusmodi fabulam
sine iudicio esse confictam? Nam cum corpora
imperatorum eâ atate cremarentur, cineresque
Traiani intra auream pilam supra suâ columnam
fuerint repositi, quali in sepulchro à cæmentariis
reperitum craneum ipsius est? Quomodo autem
linguam incorruptam haberet, quæ igne procul-
dubio fuisset assumpta, etiam quando ossa aliqua
semiusta seruarentur. Qualiter eos qui cineres in
Bithinia collegerunt, in urbem asportarunt, intra
auream pilam reclusere, latuit hoc mysterium,
cæmentariis reuelatum est? Absint procul fabu-
la.

læ. Sed & aliam huic parum dissimilem quidam
confinxerunt, nullo, nisi mendaci, innixam fun-
damento: habuisse inquam Traianum filium vni-
cum, imperij successorem futurum, qui semel
equo vectus filium, vnicum etiam, viduæ pro-
trivit & interemit, quæ apud iudices conquesta,
nec exaudita, ipsum Traianum Imperatorem ad
bellum proficiscentem adiit, ut ius sibi interem-
pti filii redderet, qui benigne acceptam vnige-
nitum suum abdicavit viduæ adoptiuum dedit
multis fœminæ opibus, & muneribus elargitis.
Commentitius iste filius Traiani, à quo patre ge-
nitus, à qua matre? absque prole namque Traia-
nus & Plotina decessere. Quis auctor huius me-
minit? In qua historia refertur, siue Traiani, si-
ue Gregorii? Decedenti namque absque liberis
Traiano, oportuit Hadrianum cooptare, qui eius
in imperio esset successor. Mirum omnes quot-
quot vtriusque ætate historias scripserunt, hunc
filium tacuisse, & nunc demum recentibus istis pa-
tuisse. Hæ & similes aliæ, veris narrationibus,
interfertæ fabellæ, certissimam historiam suspe-
ctam reddiderunt, & inter tot confictas varie-
tates, dubietatis tenebras iniecerunt. Hacten-
us de istis figmentis. Ad locum vnde digressi su-
mus, reuertamur. Ioannes diaconus Romanus,
qui diui Gregorij vitam scripsit libr. 2. capitul. 44.

ut pro-

ut proposito argumento satisfaceret, inquit, Tra-
 iani animam non fuisse Gregorii precibus ab in-
 ferno liberatam, & in paradiso repositam, quod
 omnino incredibile videretur, propter illud quod
 Ioan. 3. scriptum est Ioannis 3. Nisi quis renatus fuerit ex
 aqua & Spiritu sancto, nō intrabit in regnum cœ-
 lorum: sed solummodo dicitur ab inferni crucia-
 tibus liberata: quod videlicet, potest videri credi-
 bile. Quippe cum ita valeat anima in inferno exi-
 stere, & inferni cruciatus per Dei misericordiam
 non sentire, sicuti vnus gehennæ ignis, valet om-
 nes peccatores pariter detinere, sed per Dei iusti-
 tiam cunctos non valet exurere. Nam vniuscuius-
 que quantum meruit culpa, iusto Dei iudicio, tan-
 tum sentietur & pœna. Hucusque Ioannes Dia-
 conus. Cuius solutionem diuus Thomas admit-
 tit, & ea ipse vtitur, quarto Sententiarum dist. 45.
 Sicut & alia Altisiodorensis de Traiano ad vitam
 reuocato & pœnitente. Sed in quæstionibus dispu-
 tatis de veritate quæst. 6. articulo 6. nulli horum
 adhæret expressè, sed simpliciter & absolute re-
 spondet quasi vtriusuis tibi optionem dimittens:
 Et animam Traiani salutem fuisse consecutam,
 supponēs diluit argumenta. Sed certe difficile cre-
 derem, quietem à pœna, & non integram salutem
 animæ Traiani Deum donasse. Tum quod Da-
 mascenus referat, oraculum quod cœlitus diuus
 Grego-

Gregorius accepit hoc fuisse. Veniam Traiano do. Venia autem non dicitur proprie, nisi de culpa, & consequenter de pœna, ergo salutem animæ Traiani Deus liberalissime impartitus est. Eximere præterea hominem à tartareis cruciatibus, aut ad tempus, vel perpetuo fiebat. Si ad tempus, maius esset illi tormētum, retrudi iterum in barathrum & denuo torqueri, & ipsa etiam anxietas eandem miseriam repetendi, tormentum esset, quod continuo cruciaret. Si autem perpetua, eius requies erat, vacare inquam à tormentis, quo loco erat post diem iudicii reponendus in barathro, loco purgatorii, aut limbo? In limbo quidem non esset, qui locus est deputatus infantibus duntaxat, qui originali peccato irretiti ex hac vita discesserunt. In loco purgatorio esse non posset, cum excidio orbis superueniente, vacuus relinquendus credatur. In barathro autem quid faciet, qui nullis sicut cæteri tormentis torquebitur. Præsertim cum sententia iudicis ferenda sit absoluta, ut illi in regnum, alii in ignem æternum sint perducendi. Cum autem sine pœnitentia sint dona Dei, qui semel tormentis exemit perpetuo (ut mihi probabiliter videtur) credendus est eximisse. Cum autem nullus locus præter istos tres commemoratos super sit, in quo illius animam collocemus, de summa Dei clementia, & liberalitate credendum est,

vel

vel illum tunc in cœlo repositum, vel post aliquot
 sæcula, iuxta diuinam ordinationem reponendū.
 de his autem satis. Ad aliam iam Dominici Soto
 theologi insignissimi instituti prædicatorum sen-
 tentiam veniamus. Cuius sanctimonia & doctri-
 na clarissima nostro sæculo extiterunt. Hic in quar-
 to Sententiarum distinct. 45. quæstio. 2. 1. articul. 2.
 cum historiam liberationis Traiani à diuo Tho-
 ma receptam non audeat negare, durissimam sibi
 creditu dicit: tum oratione diui Gregorij, de qua
 re iam satisfecimus, tum quod aliquos damna-
 torum ex inferno suscitari, qui postea in cœlum
 sint euolaturi, videretur rationi prædestinationis
 aduersum: consequeretur enim quod aliqui præ-
 destinati fuissent in inferno damnati, non simpli-
 citer, sed sub conditione, nisi postea resuscitaren-
 tur. Nam verisimillimum esse, inquit, in obitu
 cuiusque sententiam absolute ferri, ite in ignem
 æternum, aut uitam æternam, qualiter est in die
 iudicii ferenda. Eadem autem est de Traiani ani-
 ma ambiguitas. Verum neque liberationem ani-
 mæ Traiani, neque reuocationem ad vitam infi-
 delium & idololatrarum, veritati obesse, quam
 tuemur, ex mente diui Thomæ, tum in quæstioni-
 bus disputatis de veritate quæstio. 6. articul. 6. tum
 4. Sententiarum distinctio. 45. quæstio. 2. articul. 2.
 quæstio. 2. ad 5. docebimus. Licet prædestinatio,
 inquit

inquit diuus Thomas , numquam mutetur , orationes tamen & alia opera bona valent ad consequendum prædestinationis effectum . Nam prædestinationis effectus est salus humana , quæ à Deo procedit , sicut à causa prima , sed eius possunt esse aliæ causæ proximæ quasi instrumentales , quæ sunt ordinatæ à diuina prædestinatione ad salutem humanam , sicut instrumenta applicantur ab artifice ad effectum artis explendum . Vnde sicut prædestinationis diuinæ est effectus , quod iste saluetur , ita quod per orationes tales , vel merita talia saluetur . Et hoc etiam Gregorius dicit in libr. 1. dialogorum , quod ea , quæ sancti viri orando efficiunt , ita prædestinata sunt , vt precibus obtineantur . Propter quod , vt dicit Boetius lib. 5. de consolatione philosophiæ : preces , cum rectæ sunt , inefficaces esse non possunt . Atqui Traianus à Deo , vt causa prima in numerum erat electorum adscriptus , sed causæ proximæ & instrumenta futura huius effectus , preces erant à diuo Gregorio pro ipsius liberatione effundendæ . Illi autem , qui fuerunt miraculosè suscitati , quorum plures constat idololatrias & damnatos fuisse , non erant in inferno finaliter deputati , sed secundum præsentem iustitiam propriorum meritorum , secundum autem superiores causas , quibus præuidebantur ad vitam reuocandi erat de eis aliter disponendum . Ita

Traianus quādo ex hac vita migravit in tartarum fuit reclusus, secundum præsentem iustitiam priorum tunc meritorum, secundum autem superiorem causam, qua prævidebatur orationibus diui Gregorii iuuandus, erat de illo aliter disponendum. Illud autem argumentum, quo Dominicus Soto videtur virgeri, quod Apostoli, ac deinceps alii euangelij promulgatores, plures inter gentes excitauerint mortuos, inter quos aliquot sua gentilitate damnatos, ita subterfugit, non suscitasse, inquit, forte, nisi illos qui inuincibili ignorantia Christianæ legis laborantes, in lege naturæ seruari poterant, aut alios cathecumenos, aut christianos, atque adeo in purgatorio existentes. Verum fallitur ea in re Soto, ut multis exemplis inductis demonstrare possumus. Beatus enim Andreas Apostolus Philopatorem Sostrati filium, vnà cum triginta aliis octo infidelibus, mari submersos, & suffocatos, vitæ restituit. Sanctus Ioannes Euangelista Callimachum, quem serpens intra sepulchrum Drusianæ extinxerat, cui stuprū mortuæ volebat inferre, qui viuæ copiam habere haud potuerat, ad vitam reuocauit: & ad bonam frugem reduxit: mortuus quippe fuerat letali crimine implicitus. Beatus Matthæus Apostolus filium Æthiopiarum regis infidelem cultuque tentum idolorum, suscitauit. Philippus Apostolus pontificis

tificis filium, qui ignem ministrabat sacrificij, & duos tribunos infideles, qui mortui fuerant, suscitauit: vt habet Abdias Babiloniæ episcopus lib. 3. apostolicæ historiæ; 4. 7. & 10. Sanctus Apollinarius martyr postea filiâ idololatram suscitauit Ruffi patritij ex consulis, Rauennæ præfecti. Beata Agnes præfecti filium idololatram, ipsamque volentem opprimere, à diabolo suffocatum vitali aurâ restituit. Deficeret tempus si reliqua exempla prosequeretur. Satis est è multis aliquot commemorasse: quo fit, vt ea in re sententiam feramus parum consentaneam definitioni Dominici Soto. Vt igitur principali argumêto solutionem adiungamus: ita nobis de ea re statuendum est. Communes leges Dei sunt, nullus sine baptismo salutem consequitur, sine fide impossibile est placere Deo. Semel locis tartareis deputatus, illos haud vnquam carceres potest effugere, quia in inferno nulla est redemptio: verum possunt aliquando ex peculiari Dei gratia & priuilegio dispensari modo, quo Sanctus Thomas loquitur supra in quarto, ob rationes aliquot Deo notas, nobis autem occultas, in comprehensibilia sunt enim iudicia Dei, & in inuestigabiles viæ eius. Arcana enim Dei quis nouit? aut quis consiliarius eius fuit? Traianus itaque imperator, qui secundum communes leges perpetuæ damnationi erat addicendus,

idem peculiari gratia salutem ex benignitate, & liberalitate diuina consecutus est, conciliantibus eam suffragijs, & precibus diui Gregorii pro ipsius animæ liberatione effusis. Qui non erat in tartarum irreuocabiliter reclusus, sed ad tempus, quandiu pro ipso Gregorius oraret: & ita potuit tartareis cruciatibus eximi, qui non penitus, sed ad certum & præfinitum tēpus illis esset torquendus. Et licet damnatis, qui in inferno cruciantur nihil ecclesiastica suffragia prodesse valeant, neque ullus possit eis opem ferre; sed debeāt in perpetuum meritis pœnas luere, qui eas numquam persolvere ualeant, verū hoc attinet ad leges communes, non quod secus possit per peculiare priui legium contingere. Quod Sanctum Ioannem Damascenum in vehementem admirationem trahebat. id enim stupendum factum verbis prosequitur: vix pro rei dignitate congruentibus, Falconillæ liberationem & Traiani inter sese conferens in hunc modum. Falconilla vnus idololatriæ, & nullius, præter id criminis rea erat. Traianus vero multos etiam marryres nō raro morti condemnauit. Mirabilis es domine, & mirabilia sunt opera tua: misericordiam tuam ineffabilem recte glorificamus: vndiquaque enim ad misericordiam propensus es. Sed gradum iam tandem reuocemus, & vela cōtrahamus ad tranquillūque portum

tū nōstra descendat oratio. Gregorius igitur pontificatus sui primo, aut secundo plurimum anno, qui incidit in Christianæ salutis D X C I. suis precibus Traiano Cæsari, cum iam ab eius obitu C C C C L X X I I I. effluxissent, liberationem à Deo, & salutem impetrauit. Si autem tanto miraculo, testimonium ferunt historiographi, si viri sancti, si diuinæ vates, si consentit, præter paucissimos, theologorum vniuersa schola, si attestatur diuus Ioannes Damascenus Gregorio ætate posterior: Si diuus Thomas Aquinās, quid est quod nos dubitemus? Historiæ receptissimæ, cur nos tenebras effundemus? Si historia hæc Romæ in diui Gregorij æde super aram marmore incisa est, cur sine ratione factum? cur sine iudicio eo loco celebri & sacro repositam credamus? Si sanctissimum pontificem Gregorium à crimine vendicamus, quod alii impudenter impingebant, ob preces ad Deum pro Traiani anima effusas: Si eius sanctimoniam magis hoc negotium præclaram facit, si maximam illi gloriam conciliat, si beatissimo Gregorio X I I I. qui illius & nomen & sedem meritissimus hodie tenet auctoritatem conciliat, & gratiam quod tanti sit viri nomen & gradum fortitus, quid est quod nos abnuamus? Si cuncta consona sunt, si cuncta cohærent; Si non est quod ambiguitatem merito faciat, nihil aliud superest

Traianus ad preces D. Greg. liberatus.

pereſt quàm quod Dei immenſam liberalitatem ,
& clementiam ſtupore & admiratione proſequa-
mur , qui in ſanctis ſuis adeo eſt mirabilis ? Eius
arcana iudicia æterna ratione innixa nihil ob im-
becillitatem iudicij humani aliud inueſtigantes ,
vaneremur . Abſint fabulæ , valeant detractores ,
increduli abſcedant , ſatis ſi pij , ſi candidi hiſto-
riam hanc recipiant , credant , amplexenturque
decus imperio , decus vrbi Romanæ , decus Hi-
ſpaniæ , augmentem , quam ſi pro rei dignitate mi-
nus apte , & diſerte tractauerim , id totum tenui-
tati ingenioli mei tribuendum , qui non quod de-
bui & volui , ſed magis quod potui , præſtiti.

F I N I S.

R E G I S T R V M.

* A B C D E F G.

Omnes ſunt Duerniones.

V E N E T I I S,

Apud Dominicum Nicolinum .

M D L X X X I I I .